

御纂醫宗金鑑

御纂醫宗金鑑卷十二

訂正仲景全書傷寒論註溫病篇

方無

御纂醫宗金鑑卷十二

訂正仲景全書傷寒論註

辨溫病脈證并治篇

內經言熱病皆傷寒之類也非謂類乎傷寒
乃謂與傷寒同乎一類之病也蓋傷寒因傷
時令之寒而得名也溫病熱病亦隨時而易
其名耳經曰冬傷於寒則爲病熱此卽時而
病者也經曰冬傷於寒春必病溫此過時而
病者也經曰凡病傷寒而成溫者先夏至爲

病溫後夏至爲病暑暑卽熱之謂也此隨時而病者也是則秋分已前皆得以熱病名之秋分已後皆得以傷寒名之矣此軒岐仲景立傷寒溫病熱病之名義也經又云藏於精者春不病溫此明過時不病之原也經曰冬不藏精春必病溫此明過時必病之故也於此可知傷寒爲病不在精之藏與不藏而但有觸犯卽得爲病非若溫病熱病藏精則不病不藏精則必病也但能藏精者縱偶感於

邪或溫或暑其病自輕不藏精者雖微感其邪或溫或暑其病必重差爲稍異耳若專以冬不藏精毫無外感爲少陰本病熱從內生則悖仲景溫病之旨矣仲景論中但言太陽初病發熱而渴不惡寒者爲溫病辨其非傷寒非謂太陽之寒不由表入竟從少陰之熱內生爲病也經又曰風溫爲病脈陰陽俱浮是明指溫病之發因感春風輒動內熱而始發所以陰陽脈俱浮也蓋以溫病風溫與熱

病論互發其義但熱病一論經已昭然若復立論未免贅疣非仲景詳於傷寒而畧於溫證也今將伏氣溫病風溫合爲一篇其溫熱治法同於六經讀者再細玩素問熱病論及刺熱評熱諸論與是論互相參考自有得焉師曰伏氣之病以意候之今日之內欲有伏氣假令舊有伏氣當須脈之若脈微弱者當喉中痛似傷非喉痺也病人云實咽中痛雖爾今復欲下利註四時令氣正氣也非時之氣邪氣也正氣之

中人也淺感之甚者卽病微者藏在肌膚不
卽爲病壯實之人可以自已邪氣之中人也
深感之雖微亦卽爲病甚則直入於藏不能
自已虛者死焉此篇所謂伏氣之病卽四時
令氣正病非四時不正之邪與非常異氣之
疫邪也所爲伏氣者如感冬令之風寒其重
者傷於榮衛卽時而發者名爲中風傷寒是
也其感之輕者伏藏於肌膚過時而發名爲
溫病是也故時氣伏氣之爲病二者不可不

辨焉春三月名曰發陳是伏氣欲發之月也
假令舊有伏氣之人乘冬不藏精之隙而病
者當須以脈識之今月之內初病傷寒溫病
者脈若微弱是少陰脈也若喉中痛是少陰
證也然其痛必緩非若外感時氣之喉痺腫
傷暴痛也今旣云實咽中痛而脈又微弱故
知爲少陰伏氣內發之陰火也雖爾咽痛恐
復欲下利不可以時氣外感陽火之喉痺治
之也

集註

張錫駒曰此條言伏氣之病由內而出非若時行卒病由外而至也

太陽病發熱而渴不惡寒者爲溫病發汗已身灼熱者名風溫風溫爲病脈陰陽俱浮自汗出身重多眠睡鼻息必鼾語言難出若被下者小便不利直視失溲若被火者微發黃色劇則如驚癇時瘵癰若火熏之一逆尙引日再逆促命期

註

發熱不渴惡寒者太陽證也發熱而渴不惡寒者陽明證也今太陽病始得之不俟寒邪

變熱轉屬陽明而卽熱渴不惡寒者知非太陽傷寒乃太陽溫病也由於膏粱之人冬不藏精辛苦之人冬傷於寒內陰已虧外陽被鬱周身經絡早成溫化所以至春一遇外邪卽從內應感寒邪者則無汗名曰溫病當以河間法用水解散審其表裏以解之水解散卽天水六一散防風通聖之合劑也感風邪者則有汗名曰風溫當以水解散減麻黃加桂枝倍石膏令微似汗以和之若大發其汗

則益助蘊熱必令身熱如火灼也蓋風溫爲病乃風邪外盛於表故陰陽六脈俱浮熱邪內壅於胸故多眠睡鼻息鼾也風邪傷衛表氣不固故自汗出壯熱傷氣故身重倦聲微語難出也若被下者則愈奪陰液故水泉竭而小便不利也太陽府氣將絕故目直視也少陰藏氣不固故遺失洩也若被火者則以火益火而陽氣熏灼將欲發黃故微發黃也劇者熱極生風故如驚癇時瘳癎也微黃病

深色漸加黑故若火熏之也溫病熱病不惡
寒者表熱也口渴引飲者裏熱也表熱無寒
故不宜汗裏熱無實故不宜下表裏俱熱尤
不宜火曰一逆者若汗若下若火也再逆者
汗而復下下而復火也一逆已令陰竭尚可
延引時日再逆則陰立亡故曰促命期也傷
寒者傷冬月之正寒也溫病熱病者傷三時
之暴寒也非時暴寒乃異氣也以其兼令氣
而爲病也故春兼風溫卽以風溫名之夏兼

暑熱卽以暑熱名之世人通名曰傷寒又名
曰時氣醫工見其傳變六經表裏情狀皆同
故同乎一治也其溫病熱病無汗者宜大青
龍湯時無汗時有汗者宜桂枝二越婢一湯
有汗者宜桂枝合白虎湯內熱者防風通聖
散表實者倍麻黃裏實者倍大黃量其病之
輕重藥之多少而解之三日之前未有不愈
者其有外感邪重內早傷陰已經汗下而不
愈者則當審其表裏隨其傳變所見之證治

之可也此法惟西北二方四時皆可行之無
不隨手取效若江淮間地偏煖處冬月初春
乃可用之若春末秋前卽脈證允合當用麻
桂青龍等湯者亦必輕而減之隨證消息適
可卽止慎不可過過則反致變逆經所謂因
病異治者此之謂也

集註

程知曰溫病熱自內出故發熱而渴不惡寒
風溫內外交熱加之自汗故有身重多眠諸
證有輕重死生之分醫者當以有汗無汗爲

辨別之大要亦卽以可汗不可汗爲救治之
微權又曰仲景之青龍白虎神矣得此意而
推廣之可以應用於不窮蓋溫病宜於發散
中重加清涼風溫不可於清涼中重加發散
也

程應旂曰太陽初得之一日卽發熱而渴不
惡寒者因邪氣早已內蓄其外感於太陽特
其發端耳其內蓄之熱固非一朝一夕矣蓋
自冬不藏精而傷於寒時腎陰已虧一交春

陽發動卽病未發而周身經絡已莫非陽盛
陰虛之氣所布濩所云至春發爲溫病者蓋
自其胚胎受之也

音切

𦵏

音旱

癰

音聞

瘰

音熾

癰

音蹤

御纂醫宗金鑑卷十三

訂正仲景全書傷寒論註痙溼暍病篇目錄

桂枝加葛根湯

桂枝附子去桂枝加白朮湯

甘草附子湯